



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ალენი (Allen) უილიამ ედუარდ დევიდ



უ. ალენი

ალენი (Allen) უილიამ ედუარდ დევიდ (6. I. 1901, ლონდონი, - 18. IX. 1973, დუბლინი), ინგლისელი ისტორიკოსი, კავკასიოლოგი.

განათლება მიიღო იტონის კოლეჯში. საბერძნ.-თურქ. ომის (1921-22) და მაროკოში საფრ. არმიის ოპერაციების (1925) დროს ყურადღება მიიპყრო როგორც სამხ. კორესპონდენტმა. 1926 პირველად ესტუმრა საქართველოს, 1928 - ლაზისტანს. 1929 აირჩიეს პარლამენტის წევრად დამოუკიდებელი იუნიონისტებისაგან. 1931 გავიდა ამ პარტიიდან. II მსოფლიო ომის დაწყებამდე მოგზაურობდა და ეწეოდა ისტ. კვლევა-ძიებას. 1943-49 იყო დიპლ. სამსახურში. 1949 ა. გადადგა სამსახურიდან და დაბრუნდა სამშობლოში - ირლანდიაში.

1920 გამოქვეყნდა ა-ის პირველი ნაშრომი „თურქები ევროპაში“ (მოკლე ისტორია). 1932 დაიბეჭდა მისი მიმოხილვითი ნაშრომი „ქართველი ხალხის ისტორია“, XX ს-ის 30-იან წლებში ა. სერ ოლივერ უორდროპთან, ჯონ ბედელისთან, ა. გუგუშვილთან და სხვებთან ერთად თანამშრომლობდა ჟურნ. „გეორგიკაში“.

1943-50 პროფ. პ. მურატოვთან ერთად გამოსცა ორი წიგნი: „რუსეთის სამხედრო კამპანიები 1941-43 და 1944-45“. 1952 გამოქვეყნდა „ბრძოლის ველები კავკასიაში: ისტორია ომებისა თურქეთ-კავკასიის საზღვარზე 1828-1921“; 1963 - მონოგრაფია

„თურქეთის სახელმწიფო ძალაუფლების პრობლემები XVI ს-ში“; 1969 - „რუსეთის ელჩობები ქართველი მეფეების კარზე 1589 - 1605“ (2 ტ.), რ-იც ეძღვნება რუსეთ-საქართველოს ურთიერთობას XVI-XVII სს. მიჯნაზე.

თბ.: A history of the Georgian people, L., 1971; Russian embassies to the Georgian Kings, v. 1 - 2, Camb., 1970.
